



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim

TAPAK 7

**Kejriwal-i maneni Delhi Chief minister inyaka jail nungi yimsüsütsü**

**Biden-i jembiba sülen Israel-i khen atema north Gaza crossing lapoktsü**



VOL. XXI ISSUE NO. 173 (ADOK 173) DIMAPUR

KÜPTOKNÜ (SATURDAY)

RONGCHII (APRIL) 06, 2024

₹ 5.00

## Political advertisements atema metetdaksür

**Kohima, April 5, 2024 (DIPR):** Tesüiba nung Election Commission of India tsüingdangi print media nung advertisements meshitak adokba ken o tem benokogo aser election agitsü lia ibala mesükba advertisements ajanga maparen ajunga menentsür ta Deputy Commissioner & District Election Officer, Kohima-i ashi. Iba nung ajemdaker ECI-i Constitution nung Arila 324 aser ano tanga ozüngtem nung ajemdaker Political Party mesüra Candidate mesüra telok mesüra kija shingai

polling anogo mesüra iba polling matongdang anogo ka jelia State/District level nung MCMC Committee-i pre-certify mesüi print media nung Advertisement kecha madoktsü metetdaksür ta Kohima DC & DEO-i ashi.

Nagaland atema Restricted Days (Poll day & one day prior to poll day) ji April 18 aser 19, 2024 asütsü ta paisa metetdaksü.

Maneni advertisement adoknürtemi MCMC dang advertisement adoktsü anogo ana jelia temelaba meshitsüla ta DEO-isa ashi.

## Centre-i Jorhat-Sivasagar railway line mapatong athi

**Guwahati, April 5, 2024 (Agencies):** Upper Assam nung MP temi junga memetetba ajanga Centre sorkari Jorhat-Sivasagar railway project thiogo.

Rs 1,832 crore endoka yanglutsüba railway mapatong ya 2017-18 Rail Budget nung benoka liasü aser kilometre 62 railway lenmang ajanga Jorhat o Sivasagar district tem sendakteptsüba liasü.

Jorhat aser Sivasagar tsüingda railway line ajanga Nagaland aser Arunachal Pradesh nunga district aika ajangzüktsü teimla liasü.

Maneni, iba railway line ya Jorhat aser Sivasagar nung meta talang pilar alidak alirtem tajungba sendakteptsü aser Upper

Assam nung aluyimer aika ajangzüktsüba liasü.

Rs 1832 crore endoka yanglutsüba mapatong agizükba sülen Railway Department-i kanga dang aritepa survey work tenzuka liasü aser küm ana tsüingda survey tembang.

Ajisüaka April 5, 2024 nü Northeast Frontier Railway ketdangsur ka dang asüingdang Jorhat-Sivasagar railway project sota ataba osang metetdaksü.

October 31, 2022 nü Railway Board senden ka nung Jorhat aser Sivasagar tsüingda railway line ajanga railway department-i rongsenketzung tsütsü tajangzük balaka mangutsü anungji iba railway line athitsü atema lemtet.

## Manipur nung IDP voters atema polling stations lapoktsü

**Imphal, April 5, 2024 (Agencies):** Manipur nung Internally Displaced Persons (IDPs) yaritsü atema Special Polling Stations 94 lapoktsü ta Chief Electoral Officer, Manipur Pradeep Kumar Jha-i ashi.

Manipur nung Parliamentary constituency ana lir- scheduled tribes atema Outer Manipur Lok Sabha constituency aser kaji Inner Manipur Lok Sabha constituency lir.

2024 Lok Sabha elections

nung Outer Manipur nung candidate 4 aser Inner Manipur nung candidate 6 tokteper.

Manipur nung aliba relief camps ajak nung Indian Voter ID Forms lemogo. Tang tashi nung ID Forms 17425 lemogo aser iba nungi forms 9875 meyipa agütsüogo.

May 3, 2023 nü Meitei aser Kuki nung tsüingda rara adokba sülen nisung 61,000 tema pei talidak toktsür ao aser pamok relief camps balala nung jenoka lir.

## Mopung tatsük süitsü, Tzünglu arutsü: IMD

**New Delhi, April 5, 2024 (Agencies):** Taruba anogo ana tsüingda India anüdoklen aser asetkong alidak mopung tatsük süitsü ta India Meteorological Department (IMD)-i ashi

IMD-isa April 9, 2024 tashi northeast region nung tzünglu kanga arutsü aser yipru aittsü metetdaksü.

Odisha, West Bengal, Jharkhand, Karnataka, Andhra Pradesh aser Telangana nung Hokokbar aser Honibar anogotem mopung tatsük süitsü ta IMD-i ashi.

Maneni, Tamil Nadu, Puducherry, Kerala, Assam, Meghalaya, Nagaland, Manipur, Tripura, Arunachal Pradesh, Odisha

aser West Bengal nung tzünglu kanga arutsü ta parnokisa ashi.

"Taruba anogo tenet tsüingda West Bengal aser Sikkim kübok tesem kar nung tzünglu arutsü, yipru süitsü aser tsüingi aitsü" ta IMD-i ashi.

Centre-i Bodbarnü state aser Union Territory ajak dang heat waves nungi jembua alitsü mapa inyaktü aser talisa ibaji Lok Sabha elections atema lokti adenshidaktsü temulung agütsütsü metetdakja liasü.

Union Health Minister Mansukh Mandaviya-i public health preparedness meyipa repringshiba sülen iba tetuyuba agütsü.

## Mkg nung PDA candidate Dr. Chumben atema nübu yimtsüogo



Mokokchung nung People's Democratic Alliance (PDA) consensus candidate Dr. Chumben Murry atema nüboyimba sentong agidang tangokba noksa angur.

**Mokokchung, 5th April (TYO):** Tang aruya aliba Lok Sabha 2024 election nung People's Democratic Alliance (PDA) consensus candidate, Dr. Chumben Murry atema nübu yimtsüba sentong tuluka 5th April, 2024 nü yangi Mokokchung town hall nung kaogo.

Iba sentong nung PDA candidate Dr. Chumben Murry-i jembidang, PDA sorkar aser legislator 60-i pa dak temulung lema consensus candidate asütsü maongka tulu agütsüba asoshi pelaba den election nung takon nua adokra, pa dak mulung lemtetba amaji akokba tashi Naga nung asoshi noktaksü, ta metetdaksü.

Pa election-i aibaji tongtibangsa kuli asem - yimjung, terenlok aser loktiliba tejakleni anir aotsü asoshi noktaker. Central nung BJP-i aniba NDA sorkar aser state nung PDA sorkari taoba mapangtem den metemdangra linük aser state yimjung nung lia aruba angur, ta ashi.

Iba den terenlok tsütsü repringdangra, state ajunga len lenmang aser nübur nungdakattem renloka aoba angur aser maneni aotsü ta imlar. Aika rongnung talisa Chief Minister Health Insurance Scheme (CMHIS) facility ya

jangratemtsü rongnung ka, iba ajanga sensakertem aser nungdaktapur aika tajangzük ngudaki, ta pai kuli kar dena metetdaksü.

Nagaland CM, Neiphiu Rio lenisüba nung central nung lenirtem den amalitepa terenlok mapatem jenti inyaktar. Ano aruya aliba küm pungu (5) jia yimjiyimjung mapang ka asütsü amanger, ta paisa shisem.

BJP nung alirtemji ajak saku masü, karibo artsü atema inyakba mapatema alitsü aser kin tilatem aser Christian pur rishikangshiba mapatema atalokdar. Pa adoktsüra, pai item mapatem anema tim mera agia inyaktü, ta paisa shisem. Pa ya par kin atema election nung noktaker masü, Nagaland songien asoshi noktaker, aser nüburtemi temulung lemtetba ama akokba tashi inyaktü, ta paisa nenshia metetdaksü.

Sentong nung Nagaland Chief Minister Neiphiu Rio-i jembidang, PDA candidate nübu tajung ka yoktsü asoshi lenla ajak nungi asadangteper Dr. Chumben Murry ya shimtet. Pa ya tetemtsü nübu ka lir, anungji, pai Naga nung wazüka aser kümzüka ayutsü imlar aser pa ya NLA züngsem 60-i shimba candidate asünung vote aikati takok tulu angutsü imlar, ta ashi.

Iba district ya Naga nung asoshi nükrangdong lir aser yangi

aliba nüburtemi Naga nung asoshi mapa tajung aika mezüng süa inyaka arubayong iba district dang "land of pioneers" ta jaloktsü. Iba district nüburtem dak temulung alemer aser yangi nungi manenisa osang tajung angashitsü imlar, ta ashi.

BJP-i aniba NDA sarkarji arutsü aser maneni Modi-isa tasemben India Prime Minister abentsü. BJP anemera lir aser BJP pukümera lir. Meimchir shinga tabensaba mali aser tangji BJP dak alaka tanga political party-i India rangben yimsü asütsüsa adoka mali, ta pai ashi. BJP telungiem (alliance) nung ya political party ajak senteper state 18 nungi 57 shi lir, ta paisa shisem.

Asen state nüburtem dak meputepba ozüngtem kecha mebenshitsü, kechiaser India temzüngi Nagaland nüburtem asoshi India Temzüng kübok temeten balaka agüja lir, anungji, iba jagi asenok kümzüka lir. Taoba mapang amato maneni asenoki Nagaland nüburtem aser tamangba yimsü wazüka ayutsü, ta pai kuli kar bener arua lemsatetep.

Iba sentong nung NDPP president & PDA chairman, Chingwang Konyak, Minister Metsübo, Advisor Imkong L. Imchen, MLA Kuzholuzo Nienu, MLA Nüklotoshi aser tangartemia shilem agia liasü.

## Lok Sabha elections nung China-i AI content amshitsü akok: Microsoft

**New Delhi, April 5, 2024 (Agencies):** China-i Artificial Intelligence (AI) ajanga adokba content amshia India nung Lok Sabha elections mapang meinprongtsü akok ta Microsoft-i metetdaksüogo.

Iba ama content ajanga United States aser South Korea ama linüktem nunga elections nung timtem agütsütsü akok ta parnoki ashi.

Linük balala nung elections

mapang China-i AI-generated content yanglutsü aser social media ajanga prokshitsü ta Microsoft-i Hokolbarnü metetdaksü.

June 2023 nungi China aser North Korea ajanga cyber aser influence trends kanga inyaka arur aser parnok alizüng atongtsü atema mapa tuluba inyaktü akok.

"China nungeri yaria inyakba campaigns nung AI-generated mesüra AI-enhanced content

tajungba yanglushia amshir. Parnoki tapu balala yangluba den parnok indang video, memes, aser audio content yanglur" ta Microsoft-isa metetdaksü.

Flax Typhoon ta ser Chinese cyber actor-i US-Philippines military exercises dak sendakba teloktem dak tenük yoka mapa inyakogo. Parnokisa 2023 küm Philippines, Hong Kong, India aser United States nunga mapa inyakogo ta Microsoft-isa ashi.

# Mokokchung nung 2nd Phase training agiogo



**Dimapur, Rongchii/April 05 (TYO):** 18th Lok Sabha atema General Election 2024 agitsü lia terenemshiba ka ama Mayangnokcha Govt. Higher Secondary School, Mokokchung nung 2nd Phase training agiba sülen Deputy Commissioner & District Election Officer, Mokokchung ajanga polling personnel ajunga asoshi 'briefing session' ka

jazüka liasü. Iba senden nung DC & DEO Mokokchung, Thsuvise Phoji-i presiding officers aser 1st polling officers ajunga pelashishia agizük aser Lok Sabha election agitsü atema pai lenmang balala sayua shisa agüja liasü. Democracy asoshi election ya nokdang lir, anungji sorkar mapa inyaker ama iba maparen

nung bendanga agütsür inyaka election tajungtiba nung sunepa tembangdaksütsü nenok mapa lir, ta pai ashi. Aruya aliba Lok Sabha election atema Mokokchung district kübok polling personnel asoshi 2nd Phase training ya Mayangnokcha Government Higher Secondary School, Mokokchung nung April 5, 2024 nü agia liasü.

# East Dimapur Town Council-i Trade License renew asütsü metetdaksü

**Dimapur, Rongchii/April 05 (TYO):** ADC aser Administrator, East Dimapur Town Council, Mhalo Humtsoe-i sangdong ka nung East Dimapur Town Council küboki aitba tesemtem nung aliba dokan aser establishments ajunga dang pei indang Trade Licenses tem April 30, 2024 tashinung renew asütsü metetdaksüogo. Iba totuyuba sülen manidaker dang ozüing agi mela aliba ama late fee meshitsü aser

Trade License agientsütsü akok, ta lai ashi. Maneni dokan kibur aser establishment tem dang Trade License renew asüba mapang küm ka atema sanitation fee agütsütsü ajungshir, ta ashi. Pei Trade Licenses indang validity metembangi amshitsü atema dokan kibur aser establishment manager temi iba mera tekeratiba nung agitsü ayongzüker, ta sangdong ajangasa ashi.

# Joint Naga political alliance senden ka amen



**Dimapur, Rongchii/April 05 (TYO):** NSCN/GPRN-K (Khango), NSCN/GPRN-R (Akato), NNC (PB) Z.Royim aser NPGN/NNC/NA (MK) indang joint political alliance senden ka April 4, 2024 nü mena liasü. Iba senden nung telok pezüprong nungi lenirtemi anir ketdangsürtem aser züngsem

aika dena liasü. NPGs pezü nungi lenirtemi iba senden nung jembidang, Naga nung ya akhi alemli mapang nungi dangar kübok meliasü ta ashi aser Naga nung mezünpuri shilem tajung agiba atema pelaba lemsatop. Naga nung lenirtemi tenzüka yutsüba mapa tajung

maneni inyaka bener aotsü atema Joint Naga Political Alliance nungdakba indang iba senden nung jembia liasü. Iba sentong tenzüka NSCN-K western command indang chaplain, Capt. Hukavi-i sarasadem aser sentong tembanga Col. Athinbo, NNC (PB) ajanga satsadema liasü.

# DC & DEO Phek ajanga department balala nem mapa lemtsüör

**Dimapur, Rongchii/April 05 (TYO):** Lok Sabha atema General Election agitsü aliba mechi Deputy Commissioner & District Election Officer, Phek, John Tsulise Sangtam, NCS ajanga Phek district kübok department balala nem mapa lemtsüogo. Item mapa ya Local Ground, Phek Town nung inyaksüba lir aser April 10, 2024 tashinung renemtsüla, ta ashi. S.D.O, PWD (Housing) Phek aser A.E, CAWD Phek ajanga metzü meshiba tesem yanglutsü, Executive Engineer, Power, Phek

ajanga Rostrum, Gallery, GHSS (Old Building) aser Local Ground nung electrification aotsü, Executive Engineer, PHED Phek ajanga Local Ground nung tzi agütsütsü aser duty atema staff balaka shima ayutsü aser DPRO Phek ajanga PA system anepalutsü, ta sangdong ajanga ashi. Paisa department shia dang SDO (C) & Nodal Officer, Transport Management Cell, Phek, Tsenthungo E. Ngullie den tekeratiba nung osang agiteptsü metetdaksü.

# FAC Mokokchung nung Cultural Exchange sentong tembangogo



**Dimapur, Rongchii/April 05 (TYO):** Fazl Ali College, Mokokchung ajanga Sherubtse College, Royal University of Bhutan den lungjemer Cultural Exchange sentong ka

ayongzüker tembanga Nokjok, Mangmetong yimdak Ao Naga farm ka semdang aser Ungma yimdak Ao Naga nung sobaliba aruba otsüren bushia angazüka liasü.

"Journey Through Naga Culture: Embracing Heritage, Connecting Communities" omen nung ajemdaker Hokulbarnü iba sentong ya agi. Nokjok nung farm

sem dangba ya Er. T. Imlisunep Ao aser par kibongi agizük, kong Sherubtse College nungi arur temi sandalwood, agar, coffee aser local peppers tem tsünüba

repranga liasü. Ungma yimdak parnok ya Ungma Village Council ajanga agizük aser parnoki akhi tetsü-tebou mapang aliba tesemtem semdanga liasü.

### Congress-i Lok Sabha election atema party manifesto saya



April 05, 2024 nü New Delhi nung Congress Tir Mallikarjun Kharge den party lenirtem-Sonia Gandhi, Rahul Gandhi, KC Venugopal aser P. Chidambaram nungeri Lok Sabha election atema party manifesto sayadang tangokba noksa nung angur.

**New Delhi, Rongchii/April 05 (Agencies):** Lok Sabha election agitsü mapang ana nung lia Hokolbarnü Congress party-i manifesto sayaogo.

Congress manifesto ji tetsürtem nem senotsü agütsütsü, mapa maongka agütsütsü aser caste census nung rangloker renem.

Congress manifesto nung 'Paanch Nyay' ji 'Yuva Nyay', 'Naari Nyay', 'Kisaan Nyay', 'Shramik Nyay' aser 'Hissedari Nyay' lir.

Congress manifesto ajanga linük tesem ajaklen caste census agitsü nangzüka lir. Iba census nungji ajemdaker party-i mapatong renemtsü, ta metetdaksü.

Party-isa Scheduled Castes, Scheduled Tribes aser Other Backward Classes nem reservation shilem 50 tashi agütsütsü atema temzüng

yanglushitsü, ta nangzü. Economically Weaker Sections (EWS) nem sorkar mapa aser shisaliok rejutem nung menden 10 lezmüksütsü, ta party-i nangzü.

Party-i küm ka tsüingda Scheduled Castes, Scheduled Tribes aser Other Backward Classes nem lezmüksütsü post tazüing aliba atema nisung shimoktsü, ta nangzü.

Congress-i sorkar mapa aser public sector enterprises nung contract system agientsü aser item ama appoint süa alirtem regularise sütsütsü, ta nangzü.

Congress-i linük tesem ajaklen Mahalakshmi scheme tenzüksü aser iba scheme kübok linük nung sensaker kibong shia nem küm shia teyari sen lakh kaka agütsütsü, ta nangzü.

Public Procurement Policy

ulushitsü aser Scheduled Castes nungi contractors nem public works contracts tali agütsütsü, ta party-i nangzü.

Party-i Scheduled Castes, Scheduled Tribes aser Other Backward Classes nungi kaketshirtem scholarship anasü agi tali kümtsütsü, ta manifesto nung shia lir.

Congress-i linük temzüng kübok Arrla balala ajanga minorities nem agütsütsü yimsü temeden akhümsütsü aser wazüka ayutsü, ta nangzü.

Manifesto sayaba jakdang Congress Tir, Mallikarjun Kharge-i X ajanga, "Congress party-i tanü party manifesto sayatsü," ta metetdakja liasü.

Party manifesto sayaba sentong nungji Congress Tir Kharge den party lenirtem-Sonia Gandhi, Rahul Gandhi, KC Venugopal aser P. Chidambaram nungera liasü.

### Taiwan nung menoknok anakba sülen India nung ana sama: MEA

**New Delhi, April 05 (Agencies):** Ministry of External Affairs (MEA)-i, tawa Taiwan nung menoknok lendong atalokba sülen India nung ana sama liasü, ta metetdaksü.

Osangbenertem senden ka nung MEA otongdar, Randhir Jaiswal-i, "Menoknok lendong atalokba sülen onoki Taiwan nung senso ana den tongteprateptsü meranga liasü. Ajisüaka tangbo tena den jembitetogo; tenaprong kümzüka lir," ta metetdaksü.

Bodhbarnü Taiwan nung menoknok lendong tuluka atalok aser ibaji ajanga Japan kübok Yonaguni Island nunga tsunami lendong ataloka liasü.

Menoknok lendong nungji nisung ter shi asü aser nisung 18 samar mangur.

Samaba nisung 18 nungjagi nisung trokbo tenemleni aturtem

liasü. Rescue team kati parnok bushidar, ta Taiwan fire department-i metetdaksü.

Iba lendong atalokba sülen Ato kilonser, Narendra Modi densema alima nung lenirtem aikati mangyim jashi lemsatepa liasü.

Ano tanga osang ka nung MEA-isa, Israel-i Syria nung Iran nung consulate amakba atema tebilemstü katsür; West Asia nung tensa tamajungba akümba ajanga region nung rara tuluba akümtsüa akok, ta tebilemstü akar, ta metetdaksü.

India-isa telok ajak dang International Law aser telatetbatem alema meinyaktsüla, ta mepishia metetdaksü.

April 1 nü Israel nungeri anüinglen nungi Syria nung Iran consulate amakdang Iran nung general ana den officer pongu asü.



April 05, 2024 nü Kishtwar nung Union Minister aser BJP candidate, Jitendra Singh-i Lok Sabha election nung tokteptsü atema nüboyimdang tangokba noksa nung angur.

### Uri nung J&K police aser sepaitemi kiralongrar ana khaset

**New Delhi, April 05 (Agencies):** North Kashmir nung Uri kübok Hathlanga area nung line of control (LoC) anasa Army aser Jammu Kashmir police senteper kiralongrar ana khasetogo, ta sepaitem sangdong ka ajanga metetdaksü.

Kiralongrar telok ka arrtsü adena aittsü merang, ajisüaka sepaitemi nokdangtet. Sepaitem aser kiralongrartem tsüingda khatepba mapang nung


kiralongrar ana khaset; tasüming kabo ngutetogo saka tasüming kabo kiralongrartem bener oadok, ta sepaitemi metetdaksü.

Tanüingba kiralongrartemji jena oadok. Army aser Police senteper maneni kiralongrartem mita odar, ta parnokisa metetdaksü.

Yaküm December ita nunga Indian Army 16 Corps (White Knight Corps)-i Jammu District nung Akhnoor sector kübok

International Border nung kiralongrartem nokdangteta liasü.

White Knight Corps-i X ajanga, "White Knight Corps-i Khour, Akhnoor kübok International Border sector nung kiralongrartem linük telungi aittsü aliba nokdangtetogo. December 22 ayaterm nung surveillance device ajanga kiralongrar pezü senzüba putetba sülen sepaitemi kiralongrartemji nokdangtet," ta metetdakja liasü.



April 05, 2024 nü Jammu nung International Quds Day anogomong nung Anjuman-E-Imamia züingsemtemi US aser Israel anema longkak aitdabng tangokba noksa nung angur.

### Cafe bomb lendong dak sendakba nung BJP nung inyaker ka apu

**New Delhi, April 05 (Agencies):** Hokolbarnü Karnataka health minister, Dinesh Gundu Rao-i, Rameshwaram Cafe nung bomb pokdaksütsüba ken o dak sendakba nung National Investigation Agency (NIA)-i Bharatiya Janata Party (BJP) nung inyaker ka puogo, ta metetdaksü.

Karnataka health minister-i X ajanga, "BJP nung inyaksangji Shimoga district kübok Thirthahalli nungi lir. Rameshwaram Cafe bomb lendong dak sendakba nung National Investigation Agency-i BJP lenirji puogo," ta metetdaksü.

Minister-isa, "Tang state nung saffron züingsemtemi kechi ashitsü, bomb lendong atema ozü sorkar nem tai tongloktsütsü asü? Iba tetezü Rameshwaram cafe bomb lendong agütsüba nung BJP-ia shilem agia lir, kechiyong NIA-i BJP lenir ka apu masü no? Linük nung RSS tangatetbatem benokba Central BJP-i iba atema kechi ashir?" ta asüingdang.

Ajisüaka NIA-i sangdong ka ajanga, "March 1 nü Bengaluru nung Rameshwaram Cafe nung

bomb apokba lendong tatalokba bushisüingdang dak sendakba nung NIA-i IED bomb pokdaksütsüsangji Mussavir Hussain Shazib liasü, ta jangjaogo aser pa den inyaksemerji Abdul Matheen Taahaa liasü ta jangjaogo. Tenaprongla Shivamogga district kübok Thirthahalli nungi lir," ta metetdaksü.

"Iba ken o dak sendakba nung kuli aser osang bendentsü atema NIA-i jenshia senzürtem aser tai tonglokja pua alirtem school aser college azüingba mapang parnok medemertem-a jaoka asüingdangyar. Iba ken o ya kiralongra tatalokba lir, anungji kulisürtem maitsü jungkai adoktsüba ajanga bushisüingdangba nung timtem agütsütsü aser onoki jaokertema lendongi yoktsü, anungji mejangjaba osangtsüsang meproksüla," ta NIA-i metetdaksü.

March 1 nikongdang 12:30 ako meta Bengaluru kübok Whitefield kiyong nung aliba kanga nüngtugu Rameshwaram cafe nung bomb tesashi ka apokba lendong nungji cafe nung inyaker staff asem densema nisung ter yirua liasü.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGCHII 06, 2024

### Congress-i sensakertem yaritsü nangzüker

- P Tiamongba Aier

Hokolbarnü (April 5) Congress-i 2024 Lok Sabha election atema manifesto sayaogo aser iba nung parnoki mapa agütsütsü, infrastructure renloktsü aser national caste census ka agitsü onüktem benoka lir. AICC president Mallikarjun Kharge-i Delhi nung manifesto sayadang pa den Sonia Gandhi aser Rahul Gandhi na liasü. Congress manifesto renemba committee ya taoba Union Finance Minister P Chidambaram lenisüba kübok liasü aser parnoki renema bener aruba manifesto nung tanga onüktem aika lir saka tongtipang kaji sensaker yaritsü aser sensaktia agientsüba lir. Congress indang manifesto dang 'Nyay Ka Dastavez' (a document for justice) ta ajaba metetdaksüogo aser iba nung 'Bharat Jodo Nyaya Yatra' - yuva (lanur), kisan (aluyimer), naari (tetsür), shramik (züngsemtem) aser hissedari (kasasa) onüktem dena lir. Hokolbarnü sayaba manifesto nükmenji 'Work', 'Wealth' aser 'Welfare' nung amendaka lir aser 'Work' tetezü mapa agütsütsü, lema magütsüdang tamasa 'Wealth' yanglutsü aser 'Welfare' tetezü sensakertem anepalutsüba lir ta Congress-i metetdaksüogo. Congress indang manifesto nung castes, sub-castes aser socio-economic jenjang jangjatsü atema linük ajungalen census ka agitsü nangzüka lir. Parnokisa "scheduled castes, scheduled tribes aser other backward classes" nem 50% quota lezmüksütsü atema Constitution yanglushitsü nangzüko. Congress-isa cash crops tsünüba aluyimertem asoshi MSP (minimum support price) tenzüksü nangzüko. 2020 nungi aluyimertemi MSP onük atema lungkak aityonga arur. Swaminathan Commission-i ashiba ama Congress-i aniba sorkar MSP atema permanent legal guarantee ka agütsütsü manifesto nung nangzüka lir aser iba ya aluyimertemi takhangba agütsüba rongnung tongtipang onük ka lir. Congress-i taruba küm 10 tsüngda nisung crore 23 taküm jenjang melenshia sensaktia agientsü nangzüko. BJP sorkar ya takartem sorkar, takartemi ketdangsüba sorkar aser takartem asoshi sorkar lir ta Chidambaram-i ashi. India nung nisung crore 23 shi ka sensakertem lir ta asadangtetogo. Tesüiba nung UPA sorkari nisung crore 24 tashi sensaktia nungi aniteta liasü anungji 2024 nung Congress-i aniba sorkar kümra küm 10 tsüngda nisung crore 23 tashi sensaktia nungi anietettsü ta Chidambaram-isa ashi. Congress indang manifesto nungsa 'Mahalakshmi' scheme tenzüksü aser iba ajanga sensaker kibong shia nung tetsür tantsütila nem küm nung Rs 1 lakh agütsütsü ta parnoki nangzüko. Congress-isa Universal free healthcare nangzüko aser iba nung diagnosis, surgery aser medication adentsü ta parnoki ashir. Rajasthan nung Congress sorkar alidang ? 25 lakh tashi cashless insurance agütsüba ama parnoki tenzüksü nangzü. Parnokisa tenüktelen mabensartem asoshi Assisted Living and Care Centres lapoktsü nangzüko. Congress indang manifesto nung khen atema student educational loans den sen tetemlok ajak agientsü aser senji March 15 nung ajemdaker asadangtsü nangzüko. Iba atema sorkari banks nem sen temenok agütsütsü ta parnoki ashi. Congress indang 2024 Lok Sabha election manifesto ji khen reprangdangra nisungtem aser talisa sensaker, tangar memenepertem aser yimdaklirtem atsür arutsü onüktem aika benoka lir. Anungji BJP-i parnok manifesto mesaya tashi ka Congress tsütsü tejak ashir aika alitsü ama bilemer, saka BJP-ia kobii melii 2024 Lok Sabha election manifesto sayadang shibai metet Congress-i renemba dang nungi kanga agi tajungba renema bener arutsü akokji nisungtem ano ilen jagi atsür aotsü ana nung dang lir. Ajisüaka political party ajaki election atema nüboyimdangbo meinyaktettsü mapa ajak nangzüker aser sorkar tashi anguba sülen amadoker ta ajangshia arurji manifesto ajanga dangbo nisungtem atsür marutettsü sudi.

## OLEMSABANG

### Esau-i pei tambu senmang chi-auso ka yong ayok

L. Kika Pongener.

Laishiba nung lipok otsü nung züngra, Abraham'er jabaso Isak'er chir tambusang Esau-i aya marem pei tambu senmang chi-auso ka-yong ayokba otsü angutsü. Ano Aor shin o ka... "Posu-i aya marem pei techanu ayok"...ta jembir. Otsü anapronglaji kanga mesuktepa lir...Esau-i pei tambu senmang (Birth-right) aya marem yoka achi aser Posu-ia pei senmangtsüpur/pei chir aya marem yoka achi. Iba otsü anaji jembidang asenoki kanga-sa menunua (Laughing) alitsü sudi. Aji oda, chi-auso ka-yong pei tambu senmang ayokba aser aya marem pei senmangtsüpur/pei techanu yoka achibaji kanga-sa tamashi mapa inyakogo ta aikati kanga sungmanga bilema alitsü sudi. Ajisuaka, tanü asen Aotsür Aor, Naga nunger rongnung mezüng tamang yimsu agizüka, mezüng shisaliok angazüka, shia-meteta, nuji akümba kin-i, sen-yong pei tambu senmang yoka chiogo. Aji oda, asen lima yanglutsü aser renloktsü atema ochishir yimsusur shimtettsübaji asenok nuburtem nem temeden agüja lir. Ajisuaka, asenok nuburtemi iba temedenji shitak amshia alima meimba aser ochishir yimsusur shimteter masü, saka kanga tesusatsüka, maka-mait marem, aya-tzüra marem, sensak marem, pei temden Vote sen-yong yoka achir.

Aor shin o ka..."Pei adianu suogo ta mangyima ajep nung ato ni-ang asü asü-a naa" ???...ta jembir. Nisung ka kodang sudir asüyim (Tipu lima)-i aor, aser 'Longer-tzü' ayong nung teka metsüker, aser iba ayong nungjagi akümlir o asür na pilar ta otsüla-oboula nungeri jembia aru. Nisung ka pei adianu suogo ta ser jepa asüyimi ao, saka kodang longer-tzü nung teka metsük...Idangjiang ato kü adianu masü, ni-ang asü-a...ta metetba otsü jembir. Tanü asen Ao kin tia reprangdangra, adianu o adianu tsüngda kati ka dak nukmerema, arishitepba, tsükchitepba, kati ka jenjang junga aliba jungnatsütsü merangba, yamala agi sunga lir. Asenoki meshisadangi kati ka anema inyakteper tang ashi, tanü aseni asen adianu kar jenjang jungnatsür amai bilema inyaker, saka ashiko ibaji pa/la kija jenjang raksatsür masü, arok külem jenjang raksar ta asenoki memeteter. Esau-i aya marem pei tambu senmang ayokba ama...Kari maka-mait marem pei jenjang raksar, ano karbo kaa-ita lir sernung, tangari 'Kibur' kümja, anemsu agi sanga jembiba nung akoseta pelaseter, tetsü-teboui alangzüka/wazüka yutsüba senmang tajung aser tambu senmang, konang aginudang, pei sasa akotoka-atokba...!!! Ajiser, aji pei sasa pei jenjang raksar ta meshisadangba aika lir...!!!

Ano asen Aor otsü ka..."Tangar asang-kolak amer tsüngsangba ngur...Matu-malem nisung ka nia nenok den tsüngsangdi ta asüngdang...Idangji na onok den tsüngsangnura, netsü kolak (Your mother's head) lepzüka bener arung...ta ashi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüngeru angateta agitsü mepishir

## Nepal nung anti-conversion ozüng kübok Khristantem anema ken o akar



Nepal yimtiba, Kathmandu nungi kilometer 100 shi pilar aliba Lapa yim dak Nepali nunger Khristantem tekülem sentong ka nung tangokba noksa nung angur.

**April 05, 2024:** Nepal nung anti conversion ozüng kübok court kati Khristan pezü anema ken o akatsü tuyuba atema Khristan lenirtemi melabela metetdaksüogo.

April 3 nü India aser Nepal arrtsülen aliba Bara nung district court-i Khristantem dangji bail nung chioktsü atema nisung shia personal bond sen 150,000 agüjang, ta tuyu.

Khristantemji taoba ita apuba sülen police ket nung anogo 24 tashi liasü. Parnoki Laishiba den yimsü dak sendakba kaketem bener tangartem Khristan yimsü dangi meyipdaksütsü merang, ta parnok nem tai tonglokja liasü.

"Iba ya Khristantem atema tejashitsü ken o ka lir," ta Nepal Christian Society (NCS) nung co-ordinator, B.P. Khanal-i metetdaksü.

Paisa, Khristantem anema inyakba ya Khristantem atema tejashitsü osang ka lir, ta ashi.

March 10, 2024 nü Khristan pezü jagi Khristan masüba kibong ka semdanga liasü. Iba mapang nungji

kiyong nung alirtem kidang jagi arua liasü.

Ano külen Hindu nütsüing teimba aliba jila nungji Khristantem sentong ka agiba sülen Australia nunger Khristan tenet densema police-i Khristantem apu.

Australia nunger Khristantemji par linüki meyipa yok aser Nepali nunger Khristan pezü anema maneni bushisüngdanga liasü.

Khanal-i, "Loktii ashiba oji Police-i anga saka onoki ashibajibo manga," ta ashi.

2015 küm Nepal linük temzüng nung tamangba yimsü temeden agizüka liasü, ajisüaka iba linük nung Khristantem reshikangshiba manener.

2017 küm Nepal-i Penal Code yanglushia tamangba yimsü meyipdaksüba nokdang aser iba ozüng kübok aibelener küm 5 tashi tepuokdak ayur aser senchi 50,000 achir.

Iba ozüng kübok tamangba yimsü kar ajungkettsüra bendangertem hopta ka tsüngda par linüktemi meyipa yoker.

"Tamangba yimsü meyipdaksüba ken otem

kanga bulua akümba ya shisabulutsü onük ka kümogo," ta Family of God Church nung pastor, Tanka Subedi-i ashi.

2018 küm nungi tenzüka tang tashi nung Khristantem anema inyakba aser Tenla kitem amakba tatalokba 20 dak tema lir, ta Nepal Christian Society-i metetdaksü.

Khanal-i, linük nung Khristantem ya ozüng alema inyakertem ama züngshir, ta ashi.

"Khristantem teimbaka kanga sensaker kibongtem nungi lir, anungji parnoki jail nungi chioktsü atema bail magütsüteter aser senchi magütsüteter," ta pai ashi.

Nepal yimtiba, Kathmandu nung aliba Assumption Cathedral nung putir, Lalit Tudu-i, "Shingaia tanga yimsü amangertem melung meyirutsütsüla aser tangar yimsü akhümtsübuttsüla. Ibaji ajanga dang loktiliba nung tesünep alitsü," ta metetdaksü.

Nütsüing million 31 aliba Nepal nung nütsüing shilem 80 dak tema Hindu nungertem lir aser nütsüing shilem 2 dang Khristantem lir.

## Somalia nung Al Shabaab teloki Khristan 6 tepset

**April 05, 2024:** March 29, 2024 nü Somalia arrtsülen aliba Dhobley nung Islamic kiralongrar telok- Al Shabaab nungi züngsemtemi Kenya nunger Khristan trok tepsetogo.

Shishilembar Khristantem jagi Khristan yimsü proker, ta tai tonglokja kiralongrartemi parnok tepset.

Khristan trok jagi tesüiba küm trok tashi Dhobley nung kidang amshiba osetsüset yoka senzü, ta Kenya nung Khristan lenir kati metetdaksü.

Osangbener den jembidang Khristan kati, "Ozü adianutem jagi pei kibong mesütsü atema shishilembaba mapa inyaker

as er Dhobley nung Muslim nungertem den Yisu Khrista temeim lemsateper," ta metetdaksü.

"Muslim nunger aikati miimshia aonung Tenla kidangi oa tekülem sentong nung adener, ta ozü Arogo nung züngsem anati onok dang shiogo. Ibayongji Al Shabaab-i Khristantemji tepset asütsüa akok," ta paisa metetdaksü.

Kiralongrartemi tepsetba Khristantemji East Africa Pentecostal Church nungi Joseph Githonga aser Simon Karimi na, Kenya Assemblies of God nungi Peter Muthuri aser Thomas Muthee na aser Anglican Church nungi James

Mwendwa aser John Kathure nunger liasü.

Taküm Febraury ita nung Githonga-i Khristan lenir ka dang, Muslim nungertem den Khrista osang lemsatepba sülen iba tesem nungji Islam yimsü toktsür Khristan yimsü agizüker aika kümogo, ta metetdakja liasü.

Khristan trok tasü mangji Kenya kübok Garissa County nung tasü mang ayudak yua lir, ta Khristan kati metetdaksü.

Alima nung Khristantem tamajungba reshikangshiba linük 50 rongnung Somalia ya tanabuba jenjang nung lir (Open Doors' 2024 World Watch List).

## ANO GO ABEN TSÜNGREM DEN

### Taküm tasen

Anungji nisung kar Khrista nung lira, pa tasen poktetba. Tejenbaji süiogo, ajiang, ajak tasen kümogo. 2 Korint 5:17.

Yisu ne mulungi aitang ta asüngdangba agi na khristan ka maküm. Kodang na tanaben aso, na Khristan ka aküm. Yisui ashi, "Atangji Züngpung ni ne dang shidi, tanaben mesora, nisungi Tsüngrem yimli mungutettsü" (Yn. 3:3). Sarasadem ka ashiba mesüra yimjak nung telemtetba agiba mesüra telemtetba agi card ka sign asüba agi na mekümzüksü. Tanaben asoba agi dang aji inyaktsü akok. Tenyar Pauli ashir, kodang na "Khrista nung lidir" tejenbaji süitemer. Na tekümtet anguba anogo nung nai menaa aliba temenentem ajak adoker. Yirur na timtema aruba ajak tanebtsü angur. Nai tamakok ngua arua liaka temeim aser agizükba ne meyong akümer. Timtem tekangshi ajak joko mali moatsür.

Kari na tanela nung tanaben asoba tesüngmangtsüji nemaa kümdaktsütsü ashiba nai angashitsü akok. "Tang na "Khristan süa nai tesüiba nung kechisa ajangshia aru ajakji ajangtsü aser ibaji akoktsü mapang agitsü" ta mesüra, "Na tanaben asotsü akok saka maneni na temenen den rarateptsü, aser nai ne tashi mait nung takok angutsü ta yimlar.

Tebilemstüji shibai na tanaben sodaktsür pa dangi asen taküm aotsü melen aseni merangba agi tanaben asotsü merangbaji lir. Na temenen nungi nüji akümtsü asoshi Laishiba nung tabensa kuli agütsübaji Yisu Khrista aser Tsüngremer chir asütsübaji teperi. Satani ibaji masü ta na mesüzüksü bushir. Shiba dang nai amangtsü?

## India nung Khristantem anema inyakba kanga bulua akümer: EFI

**April 05, 2024:** Tawa Evangelical Fellowship of India (EFI)-i India nung Khristantem anema inyakba aser reshikangshiba report ka sangdongogo.

EFI 2023 report ajanga ashiba agi, 2023 küm India nung Khristantem anema inyakba tatalokba 601 liasü, aser ibaji 2022 küm den medemdangra shilem 45 agi teimba lir.

"India linük temzüng ajanga yimsü ajak kümzükyonga aser akhidang nungi yimsü ajak aliba linük ka süaka telemsa adokdaksüba otem aser tesempa o jembiba kanga bulua kümogo. Ketdangsertemi aiben item ama tatalokba maitsüba ajanga Khristantem aser Muslim nungertem anema inyaktsü atema loktiliba nung kar temelung uludaktsür," ta EFI General Secretary, Rev. Vijayesh Lal-i metetdaksü.

India kübok tesem kar nungbo iba tensa kanga mejungü kümogo, talisa Uttar Pradesh nungbo Khristantem anema inyakba tatalokba 275

liasü, ta report nung shia lir. "Pastor tem aser tamangertem teimba apuba state ji Uttar Pradesh lir. Tamangba yimsü meyipdaksür ta tai tonglokja kuli tejangja meliaka apur," ta kasa report ajanga metetdaksü.

Tanabuba jenjang nung Chhattisgarh lir. Yaküm iba state nung Khristantem anema inyakba tatalokba 132 liasü, ta parnokisa metetdaksü.

Rev. Vijayesh Lal-i, India nung akhidang nungi tamangba yimsü ajak tesünep nung liteter aser linük temzüng ajanga-a minority nem temeden agütsür, ajisüaka minorities anema inyakba ya tebilemstü onük ka kümogo, ta metetdaksü.

India nung talisa Odisha, Madhya Pradesh, Chhattisgarh, Gujarat, Jharkhand, Himachal Pradesh, Uttar Pradesh,

Uttarakhand, Karnataka aser Haryana state nung anti-conversion ozüng kübok Khristantem nem tai tonglokja Khristantem anema inyaker.

**AO OSHI ANGAZÜKDAK:  
TANÜ ANGAZÜKTSÜBA OJANG**



Tir Yimyim

**Süksen**

(n) Ang menokloksü atema au agi tilala aser talanglang nateta yangluba ( weaver's shuttle)  
\* Sü atakdang süksen aika nüngdaker.

**Sükset**

(v) temokong agi temang kanga timtemba (suffered by intensely cold)  
\* Temokong mapang sü makaba agi sükseta mejang.

**OLONG PAITEP # 6748**

1		2		3		4
		5		6		
7				8		
9	10					11
	12		13		14	15
			16			
	17				18	

**TIPIEN**

- 1. Meimchir alidak - 5
- 3. Saklok - 4
- 5. Tatutsü - 4
- 7. Saku - 4
- 8. An-i akor - 5
- 9. Tekong sobotsü - 4
- 11. Tenük agi ajitet - 4
- 12. Tasü masü - 5
- 14. Tezuluba o - 4
- 16. Per tapu ka - 4
- 17. Temba/zünga - 4
- 18. Ita alidak - 5

**LANGTSÜNGLEN**

- 1. Tsükchirtemi arua meketbang - 4
- 2. Meperi - 4
- 3. -----g - 4
- 4. Kecha mali - 6
- 6. Tatakzük - 7
- 10. Ango apuba oset - 6
- 13. An züng - 4
- 14. Tajemdakdak - 4
- 15. Iba mapang - 4

**OLONG PAITEP # 6747 TELANGZÜBA**

**TIPIEN:**

- 1. Semtu, 3. Lepko, 5. Bilem,
- 8. Ulu, 10. Tsünpang,
- 11. Tesangwa, 13. Aoksa,
- 15. Putir, 16. Yipru.

**LANGTSÜNGLEN:**

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

**NAI-A YA METETTER MA  
WEIGHTLIFTING OTSÜ TASEN YANGLU**



Indonesia nunger Rizki Juniansyah-i Weightlifting World Cup otsü tase ka yangluogo. Thailand kübok Phuket nung Brihostibarnü arishi küm 20 tain Juniansyah-i Men's 73 kg category nung takok marok angu ta International Weightlifting Federation's (IWF) official website nung metetdaksü. Juniansyah-i snatch nung 164kg aser clean & jerk nung 201kg ajungketa ajak agi 365kg ajungketa liasü. Tokyo Olympics nung China nunger Shi Zhiyong-i 364kg ajungketa otsü yanglua aliba Juniansyah-i ajatetogo.

**Meghalaya CM convoy sülen anidakba gari nung Rs 1 crore apu**



**Itanagar, April 5, 2024**

**(Agencies):** Arunachal Pradesh kübok Longding district nung Meghalaya chief minister Conrad Sangma indang convoy sülen anidakba gari ka nung Rs 1 crore bena lia puogo.

Arunachal Pradesh nung April 19 nü Lok Sabha aser assembly elections agitsü.

Senji Badri Rai company ketdangsür ka indang gari nung bena liasü. Meghalaya CM Conrad-i Longding nung NPP candidate tem atema nüboyimtsüsü atema aodang pa convoy sülen gari anidaka liasü.

Fortuner gari (AS-01-ET-

5252) ji conviy nung maden saka parnok sülen anidak ta Arunachal Pradesh police-i ashi.

Iba tatalokba atema Opposition-i construction company aser NPP-i aniba sorkar tesentaktep lir ta aitsür.

Badri Rai and construction Limited nung Executive Director Harshvardhan Singh indang gari nung senji bena liasü ta Longding district Superintendent of Police, Dekio Gumja-i ashi.

Gariji Meghalaya Chief Minister Conrad K Sangma indang official convoy nung maden saka parnok sülen

anidaka liasü, ta SP Gumja-isa ashi.

"Ashishitep aketba gariji onok convoy nung maden aser ibaji SP Longding-ia kuli agütsüogo. Ozü National President meinba garitem ajak election code of conduct nung lateta aliba ama standard security checks süogo. Iba mapang tim masüba kecha meputet" ta NPP Spokesperson H M Shangpliang-i ashi.

Kanubari check gate nung FST, SST aser police-i gari ajak mita reprang idangji tapi aputsüsa kecha maliasü, ta pai ashi.

**CM Himanta Sarma'er sentong nung lungkak aiter 4 apu**

**Guwahati, April 5, 2024**

**(Agencies):** Tinsukia District kübok Margherita constituency nung Assam Chief Minister Dr. Himanta Biswa Sarma-i election campaign ka agidang mepetmesü adoka police-i nisung 4 apu.

Assam CM Sarma indang

sentong nung lungkak aiterem rongnung Satra Mukti Sangram Samity Tinsukia district committee president Umananda Mudoi Moran dena lir.

Parnoki Chief Minister Dr. Himanta dang temenok meshia lungkak aita liasü.

"Onoki CM dang onok khurettem lemsatepnüa liasü saka police-i onok noktang. Ibaji ajanga onoki lungkak ait. Police-i Satra Mukti Sangram Committee president Umananda Mudoi Moran dena nisung pezü apu" ta lungkak aiter kati ashi.

**Meghalaya madenba agi CAA pusema nungit: MP Agatha Sangma**

**Shillong, April 5, 2024**

**(Agencies):** Citizenship Amendment Act (CAA) kübok Meghalaya madenba agi Parliament nung iba act pusema nungi ta Lok Sabha MP aser Tura nungi National People's Party candidate Agatha K Sangma-i ashi.

Meghalaya nung opposition

party temi Agatha aitsür saka lai ashiba Garo Hills densem asübo lai Bill pusema menungitla.

CAA ya Meghalaya nungbo mebenoktsü anungji tebilemtsü mabentsüla. 2019 nung Parliament nung Citizenship Amendment Bill benokdang Meghalaya aser tanga northeast state tem maden kechiyong

taoba MP aser tang Chief Minister Conrad K Sangma-i tanga MP tem den külemi iba anema noktaka liasü, ta Tura MP Agatha-isa ashi.

CAA ajanga Meghalaya nung timtem kecha magütsüsü kechiyong state kübok alinük tila ka nung dang iba act benoktsü ta laisa ashi.

**Asür SI Junmoni Rabha tetsüi ken o meyipa agi**

**Guwahati, April 5, 2024**

**(Agencies):** Assam Police nung Sub-Inspector Junmoni Rabha taitüsü keta asüba sülen ka ka jungnüa arudang la tetsü Sumitra Rabha-i ken o meyipa agiogo.

Junmoni Rabha asüba dak sendakba nung Nagaon kübok Jakhalabandha police station nung ken o ka benoka liasü.

Sumitra Rabha den Central Bureau of Investigation (CBI) ketdangsürtem Sub-Divisional Judicial Court-i ao aser ken o meyipa agi ta osang angazüker.

Junmoni tetsüi nija tebilemba kar ajanga iba ken o meyipa agitsü lemtet ta osangbenertem dang ashi.

Assam Police nung SI Junmoni Rabha ya May 16, 2023 nü Jakhalabandha nung



gari lendong ka nung asü.

Junmoni Rabha-i aniba gariji truck gari (UP 78UT 4518) den tsüktep aser idangji la asü. Junmoni Rabha ya Nagaon kübok Mariklong police station nung in-charge inyaka liasü.

Junmoni asüba ken o ya CBI-i bushisüngdanga aru. La

ya gari lendong nung asü ta ashir saka la temang nung zübo balaka maliasü aser iba jagi nisung kari la tepset asütsü akok ta temulung melemer bilemer.

Assam DGP GP Singh-i Delhi nung CBI office semdangba sülen June 14, 2023 nü iba ken o CBI nem agüja liasü.

## Bushra Bibi nem miim agütsüba kuli mali: Doctor



Imran Khan aser kinungtsü Bushra Bibi

**Islamabad, Rongchii/April 05 (Agencies):** Pakistan indang taoba ato kilonser Imran Khan kinungtsü Bushra Bibi nem miim aketba chiyongtsü kecha magütsü ta doctor temi la temang tendangba sülen ashi. Imran Khan'er kidang nungi temai madokdaksü tepuokdak ama ayuba mapang la nem miim mozü agütsü ta Khan-i tai tongloksüba sülen doctor temi tendanga liasü.

Sen 190 million pound jenjang Toshakhana ochimashi ken o April 2 nü Adiala jail nung jembiba mapang taoba first lady nem miim agütsütsü merang aser iba miim mozü indang side effect ama la takep aser temeli nung tarak lir, ta Khan-i Judge Nasir Javed Rana dang metetdaksü.

"Ibaji shiri inyakar ni meteta lir," ta arishi küm 71 tain Khan-i tenük kata metenshie ashi.

Arishi küm 49 tain Bushra dak temang nung timtem kar danga adokra, khuret ajak

Pakistan Army chief (Gen Asim Munir)-i abentsü, kechiaser itdangiter züngsem temi Islamabad nung aliba Bani Gala aser Rawalpindi nung aliba Adiala jail ajak amshir, ta pai ashi.

Tangbo Bushra Bibi nem miim agütsüba kuli monguteter aser Bushra Bibi nem miim mozü agütsüba jangjatsü atema medical test kecha magütsü, kechiaser la dak timtem kecha puteta mali, ta Dr Asim Yousuf-i osangbener dang ashi.

Ita ana tejakdang Bushra Bibi-i chi khen chiyongba sülen temang tamajungba akum, ajisüaka la temang nung timtem aliba mechi chiyongtsü ajema achitsü tenzük, ta doctor-i ashi.

Ita ana tejakdang la temang nung kechi agi timtema liasüar ajibo memetet ta pai ashi.

Dr Yousuf-i tar dak sendakba timtem kecha ali mali tendangtsüla ta ashi aser Pakistan Tehreek-e-Isaf party

tentetsang Khan den Honibarnü ajuruteptsü ta ashi.

Imran Khan ya tangbo junga lir, saka pa temang tera mejungi akumba sülen achi-ajemba akhi ama masü kumogo, ta Dr Yousuf-i ashi.

Okadak nokdaksü anasa osangbener den jembidang, Shab-e-Meraj mapang la indang chiyongtsü nung toilet cleaner tzüjang asem meyokteptsü, ta Pakistan indang taoba first lady ajanga ashi. Tepuokdak ketdangsur temi agütsüba chiyongtsü aser tzü tako liasü, ta lai ashi.

Tasüngdangba langzüdang, tepuokdak nisung kari küdang kü indang chiyongtsü nung toilet cleaner meyokteptsüogo ta ashi, ta Bushra-i ashi.

Ajisüaka lai ketdangsur tenüng temai adoktsütsü memulung. Kü tenük awak, kü teku aser tepok nung tashitsü atu, ta lai ashi.

Khan ato kilonser inyakdang sorkar nem sempet agütsüba ozüng alema ayokba Toshakhana corruption case nung Khan aser Bushra Bibi na küm 14 tepuokdak ayutsü January ita obendang agüja liasü.

Toshakhana ya Pakistan nung cabinet division kübok department ka lir, kong ketdangsur nem jenjang tulu aketba sempet agütsüba tem rizünga ayur. Ketdangsur temi anguba sempet ajak osang iba department nem agütsütsüla.

Khan ya Rawalpindi nung aliba Adiala Jail nung yua lir aser danga ken o ana nung aija alila Bushra Bibi ya Bani Gala ki nung yua lir, koba sub-jail ta sangdonga lir.

## LAND FOR SALE

AT YIMYU WARD

NEAR YIMYU WARD

--- CONTACT ---

6909248832 / 9774347784

## Israel-i amakba melangzüi metoktsütsü: IRGC

Tehran, Rongchii/April 05

**(Agencies):** Iran nung Al-Quds Day nungtem nung tesem ajungalen rally ayongzuka agir aser Syria nung Iran idang consulate amakba atema Islamic Revolutionary Guard Corps (IRGC) indang commander-in-chief ajanga tayang kepzüksü nangzük.

Israel-i Damascus nung tayimtsü amshia amakdang nisung 13 tepset aser item rongnung IRGC züngsem tenet - parnok rongnung Syria aser Lebanon nung Corps' Quds Force aniba general ana densema liasü.

Hokulbarnü Tehran nung sorkari ayongzükba sentong nung nisung meyrirjang aika adenshia lia "Tsükchir temi asen temeshi tamentetba (Islamic Republic) anema inyaksangshiba melangzüi metoktsütsü," ta Hossein Salami-i ashi aser iba mapang yangji alirtemi "America asoshi tasüba" aser "Israel asoshi tasüba" ta ayimtena liasü.

Israel-i Gaza nung raraba nung tamakok dak alaka kecha majurur aser Gaza nung aliba Palestinian fighter temi "Onoki Gaza nung Zionist yimli ali nung aremtsü" ta ashir, ta pai ashi.

"Zionists aser parnok yariba America nungeri Muslim nunger timta tepseta ali rakzuka parnok tesem balala nung prokshidaksüba ajanga parnok takum tajungba akumtsü ama

amanger, saka asangsang nung aji khenyongi masü."

Tehran aser linük tesem balala nung demonstrators tem state television ajanga sayuba nung Tir Ebrahim Raisi aser Quds Force lenir Esmail Qaani densema sorkar ketdangsurtem, obendangertem aser mitkar lenirtem nguogo.

Central Tehran nung IRGC züngsem Syria nung tepsetba atema funeral procession tuluka liasü, kong Supreme Leader Ayatollah Ali Khamenei-i sarasademja liasü.

US-i drone amshia January 2020 nung Iraq nung Quds Force commander Qassem Soleimani tepsetba atema pai sarasademja liasü.

Sistan-Baluchestan yimtiba Zahedan nunga uniform semer aliba armed forces temi Brehostibarnü "kiralongrar" temi tepsetba tasü mang bener senzua liasü.

Bendangeri yarir ta Iran-i tai tongloksüba separatists Jaish al-Adl telok nungi prangbong bener arua iba province nung Chabahar aser Rask yimtem nung amenoka aliba IRGC base ana amakdang armed forces züngsem 11 tepset aser civilian kar kanga sashia yirutsü.

Prangbong bona alir par 19 prong ya bendanger südi ta amanger aser parnok ajak tepsetogo aser parnoki pua bener aoba civilian tem kumzükogo, ta Ministry of Interior ajanga ashi.

## Biden-i jembiba sülen Israel-i khen atema north Gaza crossing lapoktsü

Tel Aviv, Rongchii/April 05

**(Agencies):** Israel mitkari chiyongtsü teyari agütsür dak amakba sülen United States Tir Joe Biden-i civilian aser humanitarian mapa inyaker kumzuka ayutsü atema mera agütsü tekum dangtsü agütsür ghonda ishika lir Israel-i teyari atema Gaza north tsütsü Beit Hanoon (Erez) crossing tanaben lapoktsü ta shiogo.

Israel-i ita trok jungnüa Gaza amakba nung nisung 33,000 dak tema tepsetogo aser nisungi yangluba ayawara tenzüktsü tejangja lir ta tekum dangtsü ashir.

Ato Kilonser Benjamin Netanyahu indang office ajanga, Erez crossing leni belena yoktsü atema humanitarian aid packages agizüktsü asoshi Ashdod port khen atema lapoktsü, ta Hokulbarnü ashi - koba October ita rara tenzükter tang mezüngbuba lapoktsü indang ashir.

Israel-isa kidanger Jordan

linük nungi teyari osettsüset tem Gaza south tsütsü Karem Abu Salem (Kerem Shalom) crossing alema yokba tali kum daksütsü ta ashi.

Item crossings lapokba ajanga teyari tali agütsütetsü aser humanitarian crisis nungi kumzüktsü aser ibaji maneni raratsü aser rara indang nukjidong tongtettsü atema tenüngdaksü ta Israel-i ashi.

US tiri tangsa ceasefire alitsü atema ashi aser Gaza leni teyari yokba tali mekum daksüra Washington-i Israel nem yimtenren aser mitkar tsütsü teyari agütsüba nung temelenshi alitsü renema lir ta metetdaksü, ta Brehostibarnü Biden aser Netanyahu tsüngta telephone ajanga jembiba sülen White House ajanga ashi.

Biden o Netanyahu ya minute 30 shi phone nung jembiba liasü aser iba mapang US nung amenoka aliba World Central Kitchen nung inyaker nisung tenet tepsetba atema

Biden-i aitsü.

Hokulbarnü Belgium nung EU lenirtem den külemi nokdaker jembidang, "Asangsang nung kuliji results tem alitsü aser aruya aliba anogo aser hopta tsüngta asenoki aji angutsü," ta US Secretary of State Antony Blinken-i ashi, koba Biden-i tekeratiba nung mera agütsü akhangba nenshia ashir amai angateter.

Hopta tetenzüklen World Central Kitchen (WCK) nung teyari agütsür nisung tenet tepsetba sülen linük balalai Israel dang mepelar, koba tenük yoker tayimtsü amshia amakba lir ta WCK-i ashir.

Israel-i bomb pokloksüba aser amakba mechi tesüiba ita trok tsüngta Gaza nung nisung million 1.7 shi mesüra Gaza nütsüng yongsük 75 shi pei ki yutsür tesem balala nung jenoka lir ta UN-i ashir. Gaza north tsütsü tanurtem aya agi asür ta World Health Organization-ia ashir.

US-i Israel nem nok-nü maneni agütsür aser rara anena atatsü ajungshia Gaza nung civilian aika asüba atema bilemstüba lemsateper.

WCK convoy amakba sülen British Ato Kilonser Rishi Sunak danga yimten yimsüsür temi Israel dang hadir ayokba anentsü akhanger tali kumtar.

Gaza nung Palestine nunger ayawara jenjang nung alirtemi nungdaka aliba peritsüsa Israel-i humanitarian aid meyer, ta United Nations-i ita aika jembia arur.

Hamas madak takok angutsü nukjidong nung Gaza telungi tongtipang supplies tem yokba nung Israel-i tetsükdaksü agüja arur aser kinü tanurtema aya agi asür.

Item tongtipang mera agia mapa kuma inyaker Gaza tesem ajungalen anogo ishika tsüngta teyari kangasa nungdaka aliba civilian tem nem teyari agütsütsü asoshi Biden administrationya Israel,

Jordan, Egypt, UN aser humanitarian organisation tem den külemi teka amteper inyaksü renema lir, ta White House National Security Council spokesperson Adrienne Watson-i ashi.

Israel security cabinet ajanga telemtetba agiba ya National Security Minister Itamar Ben-Gvir-ibo pela magizük aser sorkari iba atema vote magitep aser Netanyahu indang office-i sangdongba ya meshidak ta ashi.

October 7 nü Hamas teloki pua bener aoba Israel nunger tang tashi Gaza nung yua aliba chioktsü atema Gaza leni teyari yokba anentsü ya lenmang shidak lir, ta pai ashi.

"Rafah-i aitsü melena Gaza leni hadir yoktsü ang jembiner, koba indang-indanga Hamas atongtsü," ta Ben-Gvir-i ashi. Gaza kübok Rafah yimti nungya Palestine nunger nisung million 1.5 shi jenoka lir.

"Asenoki tangsa Rafah-i aitsüla," ta pai ashi.

### 4th Late G. Rio Memorial U-19 cricket asayamung osang

**Dimapur, Rongchii/April 05 (TYO):** 4th Late G. Rio Memorial U-19 Inter-District Cricket Tournament

Hokulbarnü semi-finals nung Dimapur-i Zunheboto madak takok ang i aser Niuland-i Mokokchung madak takok ngua final tongogo.

Nagaland Cricket Stadium, Sovima nung Dimapur aser Zunheboto tsüngta asayaba nung Dimapur-i wicket trok agi akok.

Mezüng batting shimba sülen Zunheboto-i runs 105 yangluteta liasü. Asaya tenzükdang Zunheboto nungi asayartemi kanga junga asaya liasü, saka Sundram-i ball kanga junga onteta middle order pur aika out sütsü aser iba asayamung nung pai wicket pongu tanaben buba agiteta liasü.

Zunheboto nungi runs tera angurtemji Raja (18 runs), Bekuto (17 runs) aser Aarush

(16 runs) nungertem liasü. Dimapur-i iba target ya over 12.2 nung wicket pezü out sür tongteta liasü.

Ano semi-final asaya dang aka Sovima Cricket Ground nung Niuland aser Mokokchung tsünga asaya liasü.

Iba asaya nung Niuland-i wicket ka agi Mokokchung tsükdakja final tongogo.

Over 50 nung Mokokchung-i runs 157 yanglutet aser wickets ti out süa liasü.

Mokokchung nungi Moatemsu 51\* (66 balls) aser Inmawapang 15\*(102 balls) nati kanga meranga asaya aser Niuland bowler temi tena out mesütsütet.

Par telok nungi Imnatoshi-ia runs 17, Salangdangba-i runs 15 aser Zany Lemtur-i runs 10 nguteta liasü.

Niuland nungi Jatin-i wicket asem, Sonu-i wicket ana aser Kumar o Darsh nati wicket ka-ka agia liasü.

Niuland ya asaya tetenzüklenbo takok angutsü teimla kangabo meliasü, kechiaser mapang ka parnoki runs 72 dang nguteter wicket ti tashi out sür liasü.

Mokokchung nungi abelen kayim chinnaman spinner Amongti-i over ter nung wicket pezü agi aser runs 16 dang agüja liasü.

Ajisüaka Niuland nungi Kundan (81 runs) aser Sonu (23\*) nati par telok kumzüka target tongtet.

Mokokchung nungi Inmawapang-i wicket ana agi, Salangdangba, Moatesmu aser Zany Lemtur nungeri wicket ka-ka agia liasü.

4th Late G. Rio Memorial U-19 Inter-District Cricket Tournament final match ya Dimapur aser Niuland tsüngta Nagaland Cricket Stadium, Sovima nung Honibar anepdang 9:00 ako nungi tenzüka asayatsü.

### Monte Carlo Masters nung Rafael Nadal masayatsü



**Madrid, Rongchii/April 05 (Agencies):** Brehostibarnü Monter Carlo Masters nungi Rafael Nadal withdrew süogo, koba 22 ben Grand Slam winner ya ATP Tour-i meyipa shilangba ka asütsü imla liasü.

"Tia maka ni Monte Carlo nung masayatetsü ta ashitsüsa akumer. Kü temang agi memelar," ta arishi küm 37 tain Spain nungbai social media nung ashi.

Otsü yanglua Monte Carlo asayamung 11 ben koka alisang ya yiruba mechi 2023 season tepiyong amai tennis masayatet aser taküm seasin nung pai Brisbane International dang asaya, saka yangji pa teperem

yiruba tali tamajungba akum.

March ita Las Vegas nung exhibition match ka asayadang pai Carlos Alcaraz makok aser iba sülen Indian Wells Master nunga masayatetsüsa akum.

"Ni meranga inyakaka aser ni atema kanga tongtipang tournaments nung tokteptsü asoshi anogoshi kü tashi ajak agi merangaka, atangji nung ni tanü masayateter," ta Nadal-i ashi.

"Item asayamung nung masayatetba yagi ni koda jashir nenoki memetet."

"Ni inyaktetsü ajak agi tensa tia agizüka tarutsü anogotem tejangraba nung asayatetsü asoshi merangtsüba dang lir," ta pai ashi.

### Champions League QF nung Bayern Munich nungi asayar aika shilem magitetsü akok

**London, Rongchii/April 05 (Agencies):** Arsenal nung

Mongulbarnü Champions League quarter-final asayatsü aliba nung Manuel Neuer, Leroy Sane, Kingsley Coman, Aleksandar Pavlovic aser Noussair Mazraoui nungeri shilem agitsü ano mejangja lir, ta Bayern Munich coach Thomas Tuchel-i Hokulbarnü ashi.

Par ponguprong ya Honibarnü Heidenheim nung masayatetsü aser par ponguprong ya anisüngzük melie asaya aru, ta Tuchel-i osangbener dang ashi.

"Honibar atema parnok squad nung mali, kechiaser parnoki masayatetsü aser iba yongji Mongulbar atema tasüngdangba tulu lir."

League nung Bayern ya Xabi Alonso'er Bayern Leverkusen dang points 13 agi tajemba lir aser ano asaya tenet anünga lir. Aser iba yongji Bayern-i 2011-12 sülen Bundesliga takok korang bena aliba tang mezüngbuba chioktsü.

Bayern ya German Cup nungi third-division Saarbruecken-i tsükdaktsüogo, anungji parnok asoshi tatembangba maongkaji Champions League ya dang anünga lir.

"Onok tang tashi nükjidong ka anünga lir aser ibaji Wembley-i aotsüba lir," ta Tuchel-i taküm season indang Champions League final asayatsüba tesem athishia ashi.

"Onok quarter-finals nung lir, anungji mera aika agitsü mali. Iba nükjidong dak alaka kecha mali."

Bayern-i tang season nung tezü atangba ya ajungmesoba agi melendaktsütsü ta pai ashi.

Bayern-isa technical director aser mapang talangka nungi scout inyaka arur Marco Neppe club nungi pilaba Hokulbarnü sangdonga liasü.

Neppe ya taoba mapang Germany indang lower leagues nung timba asaya aru aser pa Bayern nung alidang Jamal Musiala aser Alphonso Davies densema sempet aliba asayar aika pai jangjateta liasü.

Maongka agütsüba atema Neppe-i Bayern dang pelaba lemsatepa liasü.

### Shooter pongui NRAI dang Olympic trial criteria ajemtsü mepishir

**New Delhi, Rongchii/April 05 (Agencies):** Asian Games

nung medal angurtem densema linük nungi shooter tajung kari National Rifle Association of India (NRAI) dang Paris Olympic selection trials atema criteria ajemtsü mepishia züluoko, aji asünung dang parnokia shilem agitetsü.

NRAI indang selection criteria nungya, category shia national ranking aser Qualification Ranking for the Olympic Games (QROG) points nung ajemdaker shooter pongu dang trails atema arutetsü, ta shia lir.

2024 Olympic Games atema pistol aser rifle contingent shimtsü atema Delhi aser Bhopal nung trails pezü agitsü lir aser yangji takok angurtem Paris-i otetsü.

Mezüngbuba Olympic Selection Trials (OSTs) ana Delhi nung aliba Karni Singh Range nung April 18-27 nung agitsü aser tanünga trails ana ya Bhopal nung May 10-19 tsüngta agitsü.

Ajisüala linük asoshi Paris quota ajangzüker alir shooter 19 nungi kar tangya form nung mali aser dangar kari natlonal aser international competitions nung scores tajungba nguteta lir, shirnok Olympic nung

shilem agitetsü langa lir.

Ajidang masü, shooter karbo tanen makai kanga junga khateter saka rank tsütsü mejungi top-five tsünglangi aluatok. Parnoki tera agi dang spots metongtet nung parnoka selection trials nung shilem agidaktsütsüla ta bilemer.

"Tang tashi criteria nung temelenshi mali. Trials nung par pongu tenüng inoktsü mepishia shiti züluba onoki nguogo, saka onoki criteria memelenshitsü. Criteria melenshitsü atema NRAI senden jatepa mali," ta NRAI secretary Rajiv Bhatia-i osangbener dang ashi.

Taoba küm 50m rifle 3 positions nung tetsür shooter kati Olympic quota ajangzük aser national ranking nung la jenjang 16 bubai alu, saka la Paris atema trials agitsü asoshi top-5 nung dena lir.

Ano tebur rafle shooter aser Asian Games medallist ka 50m rifle 3-positions trials nung dena lir, saka World Cup nung score ka majungba yong pa indang ranking mejungi kuma 10m air rifle trials nung maden.

Asiang Games nung medal angur ka dena tetsür pistol shooter anati NRAI dang trials atema parnok tenüng inoktsü mepishi ta angazüker.

### Nagaland Aainball Association ajanga coach training ayongzüktsü

**Dimapur, Rongchii/April 05 (TYO):** Nagaland Aainball Association ajanga Aainball Coach Training ka ananü atema April 8 & 9, 2024 anogotem State Environment & Forestry Training Institute, Signal Angami, Dimapur nung agütsütsü. Iba training ya NABA tir aser MLA Kuzholuzo Azo Nienu aser Chief Advisor Sandeep M. Tamgadge IPS,

ADGP (Law & Order) aser Advisor T Aochuba, IFS Director INP nungertem lenisüba kübok agitsü.

Iba training nung Professional Aainball Coach Dipankar Kalita ya Master Trainer asütsü, shiba Aainball nung international player ka lir, aser pa den Pragyan Sarma alitsü.

Training ya anogo ana atema alitsü aser iba asaya jangrartem

asayamung asaya angazüktsü jangra alirtem arua anogo anaprong nikongdang 2:00 ako nungi angati training agitsü ayongzüker, ta sangdong ka ajanga ashi.

Iba training ya arishi küm 16 nungi tema tetsür aser tebur atema alitsü aser iba training nung sports wear den running shoe semer arua training agitetsü, ta sangdong ajangasa ashi.

**BILEMDANGANG**

"Nü takum tajungba kuma melenshitsü nüdak tashi lir."